

20 APR 2002

PUM-Terrorisme

NEGARA ISLAM PERLU BERGABUNG TENTANG KEGANASAN ISRAEL

PETALING JAYA, 20 April (Bernama) -- Kekejaman oleh tentera Israel terhadap rakyat Palestin hanya dapat dihentikan sekiranya negara-negara Islam di dunia bergabung tenaga dan bersedia menghantar sukarelawan membantu pertempuran di negara itu.

Yang Dipertua Persatuan Ulama Malaysia (PUM) Abdul Ghani Samsudin berkata langkah awal yang boleh dibuat ialah dengan membuka ruang bagi melatih sukarelawan yang bersedia untuk dihantar berperang menentang keganasan oleh tentera Israel.

Bercakap kepada pemberita selepas merasmikan seminar sehari Kempen Menentang Terrorisme anjuran persatuan itu, Abdul Ghani berkata sukarelawan yang sanggup mempertaruhkan nyawa membantu rakyat Palestin harus diberi peluang menjalani latihan ketenteraan di negara masing-masing.

"Seluruh dunia Islam patut buka ruang untuk sukarelawan berlatih, ini kalau orang bawa parang pun kita dah tangkap, macam mana nak lahirkan pejuang-pejuang yang mahir?", katanya.

Beliau berkata langkah Malaysia yang bersedia menghantar tentera pengaman ke Palestin dibawah Pertubuhan Bangsa-Bangsa Bersatu (PBB), mungkin tidak akan mencapai matlamat utama membantu rakyat Palestin.

Rabu lepas, Perdana Menteri Datuk Seri Dr Mahathir Mohamad berkata Malaysia sedia menghantar pasukan tenteranya ke Palestin sekiranya PBB memutuskan untuk menghantar pasukan tentera pengaman bagi menghentikan pertempuran antara rakyat Palestin dengan tentera Israel.

Abdul Ghani berkata PUM bimbang tentera Malaysia di bawah PBB tidak dapat berfungsi dengan sempurna sekiranya menerima campur tangan kuasa besar lain.

"Yang kita bimbang tentera PBB yang akan dihantar akan ditentukan oleh pihak Nato, pihak yang lebih berkuasa dan mereka akan mencongak dari sudut kepentingan strategi barat, jadi kadang-kadang tentera kita hanya tentera 'foot soldiers', melaksanakan apa yang mereka rancang, yang kadang-kadang tidak sangat memihak kepada orang Islam," katanya.

Mengenai seminar anjuran PUM itu, Abdul Ghani berkata ia antara lain bertujuan menjelaskan pengertian terorisme daripada sudut politik, agama dan sosial.

Katanya melalui seminar seumpama itu, ia akan dapat memperjelaskan pengertian jihad dan perjuangan pembebasan tanah air daripada perspektif Islam.

-- BERNAMA

ZAI MFJ ZB